

Segun Tico Croes di AVP

PA MOTIVO DI GABINETE ODUBER E STATUS APARTE AWE TA DEN PELIGER

ORANJESTAD (AAN) Parlamento Tico Croes di AVP a bisa cu dia 13 di Juli 1990, Nel Oduber a regresa for di Hulanda cu e informe, cu el a firma un acuerdo cu Hulanda pa schrap e fecha di Independencia na 1996 for di Statuto.

Segun Tico Croes, Prome Ministro a bisa cu Hulanda a bay di acuerdo pa Aruba mantene su Status Aparte te ora e pais mes dicidi cu e kier asumi su Independencia. Un documento cu e acuerdo basico a worde presenta y a worde bisa cu lo bay cuminza traha ariba realizacion di e cambio necesario den Statuto.

AVP cu na 1989 a percursa pa un rapport, "Doño di nos Propio Destino", den cual a worde muestra cu e pueblo di Aruba tin e derecho sagrado den autodeterminacion y despues di e bishita na Hulanda den October 1989, a regresa cu e mensahe cu Hulanda lo bay di acuerdo pa schrap e fecha di Independencia, a keda hopi sorprendi pa e mensahe di Prome Ministro Oduber.

Segun Tico Croes, e sorpresa di AVP tabata grandi, pasobra MEP tabata e partido cu a sigui insisti ariba Independencia. Nos por corda con promer cos cu Prome Ministro Nel Oduber a haci tempo el a asumi gobernacion tabata a base di un mocion sosteni pa henter coalicion, viaha pa Hulanda pa regla e asunto di Independencia, aunke AVP a bisa cu porta ta habri pa Aruba dicidi di e kier schrap fecha di Independencia. Ariba e mes dia, lidernan di barío di MEP a sigui ariba Independencia y e representante Hulandes a worde califica como "mensahero", for di

kende Nel Oduber no kier a acepta ningun mensahe Hulandes.

Mientras AVP tabata insisti ariba mantencion di Status Aparte, e Ministro Hulandes su plan, cu a laga caminda habri pa Aruba schrap e fecha di Independencia y mantene lazonan directo cu Hulanda. E cambio den actitud di Hulanda ya for di e tempo ey a keda señala como un confirmacion di e hecho, cu Hulanda no tabata tin confianza mas cu gobierno di Aruba lo por a garantiza un bon gobernacion democratico. E excusanan gubernamental di gabinete Oduber a pone Hulanda tuma e paso, pa evita cu na 1996 Aruba por conoce un dictadura ora e relacion protector cu Hulanda stop di existi. Prome Ministro Oduber tabata tin hopi reserva enfrente e plan Hirsch Ballin, pasobra el a keda sorprendi pa e cambio di actitud di Hulanda pa no forza Independencia mas y no tabata sa exactamente kico haci enfrente di e actitud nobo di Hulanda.

Parlamentario Tico Croes a sigui bisa: cu na Mei 1990 ainda lidernan di barío di MEP a duna sosten na Independencia y hasta Rudy Croes a manda carta pa Nacionnan Uni, denunciando Hulanda como pais colonizador, cu kier a usa economia pa tene Aruba den seno di Reino.

Mirando cu el a hinca Aruba den un pos, manera e mes a señala na un ocasion, no a keda Prome Ministro Oduber nada otro di acepta e punto di bista di AVP cu Pueblo di Aruba su deseo ta Status Aparte y no Independencia. E cambio sorprendente di Sr. Nel Oduber pa acepta Status Aparte tabata debi na e nece-

sidad di placa pa su gobierno y tambe na e hecho cu Hulanda a pone esaki como un di e condicionnan pa ricibi e yudanza financiero. E hecho cu Nel Oduber a bolter di biaha di Independencia pa Status Aparte tambe tin di haber cu Hulanda no tabata tin confianza den un gobierno di Oduber cu a cuminza muestra señalnan di dictadura y totalitarismo.

Segun Tico Croes, ora cu Prome Ministro Nel Oduber a firma un documento na Hulanda dia 13 di Juli 1990, tur clase di honor a worde duna na Nel Oduber, lubidando cu ta AVP, cu a haya sosten den su postura di gremionan a logra cambia e punto di bista di Hulanda encunto Independencia. No mester lubida tambe cu e bishita di Prome Ministro Nel Oduber na Hulanda tabata pa busca placa, y cu e no a inclui den su delegacion e Ministro cu a

asuntanan di estructura estatal, esta Hendrik Croes.

A worde spera cu unavez Nel Oduber a reclama e gloria pa su mes, e lo a tuma pasonan pa concretiza e cambio necesario den Statuto. Awor, despues di mas di un año, den seno di Parlamento Hulandes e futuro estatal di Aruba ta worde poni atrobe den balanza. E negligencia di e gobierno Oduber pa e atende e cambio den Statuto inmediatamente, a ocasiona cu awe den Parlamento Hulandes ta worde cuestiona si Aruba no mester regresa den federacion Antillano. Regresa di Aruba den constelacion Antiyano ta inaceptable pa AVP, partido cu a nace for di e aspiracion di Pueblo di Aruba pa sali for di e constelacion Antillano.

Segun Tico Croes di AVP, si awe ainda den Parlamento Hulandes por worde papia di cualkier otro futuro estatal pa

Aruba, cu no ta Status Aparte, manera Pueblo di Aruba a dicidi, ta pasobra den e caso aki tambe gobierno di Aruba, despues di a hunga politica no a haci su trabao. AVP ta spera cu, si di berdad Nel Oduber ta kere den Status Aparte, pa inmediatamente e percursa pa por yega na e cambionan necesario den Statuto pa asina evita hasta remarkenan sin ningun fondo encunto futuro estatal di Aruba. Mientras gobierno di Aruba tene e acuerdo di principio encunto futuro estatal di Aruba den lachi, gobierno di Oduber ta keda responsable pa tur daño cu negligencia por causa Aruba. Pero ta bon e punto di bista di Partido di Pueblo Arubano keda bon cla, esta cu hamas y nunca lo por entrega e Status Aparte cu tanto Pueblo di Aruba a lucha pe, asina Tico Croes a termina bisando.